

# XEDAPEN OROKORRAK

## HEZKUNTZA SAILA

### 3016

*AGINDUA, 2024ko ekainaren 14koa, Hezkuntzako sailburuarena, haren bidez finkatzeko 2024-2025eko ikasturtean Universidad del País Vasco / Euskal Herriko Unibertsitateko goi-mailako hezkuntzako zerbitzu publikoen truke ordaindu beharreko prezioak, bai eta prezioetan salbuespenak eta murrizketak izateko baldintzak ezarri ere.*

Euskal Unibertsitate Sistemari buruzko otsailaren 25eko 3/2004 Legeak 95. eta 96. artikuluetan arautzen ditu zerbitzu akademikoen eta gainerako eskubideen truke ordaindu behar diren prezio publikoak, eta adierazten du prezio horiek prezio publikoak direla eta, beraz, tasa eta prezio publikoari buruzko lege-ordenamenduan ezarritakoaren arabera arautuko direla.

Bestetik, Euskal Autonomia Erkidegoko Administrazioaren Tasa eta Prezio Publikoari buruzko Legearen testu bateginak –irailaren 11ko 1/2007 Legegintzako Dekretuaren bidez onartua– 30. artikulutik 35.era bitartekoetan arautzen ditu prezio publiko horiek finkatzean kontuan hartu beharreko irizpide orokorrak.

Euskal Autonomia Erkidegoko Administrazioaren eta haren erakunde autonomoen prezio publikoen arabera ordain daitezkeen zerbitzu eta jarduerak zehazten dituen uztailaren 30eko 397/2013 Dekretuak 2. artikuluan xedatzen du Euskal Autonomia Erkidegoko sailek eta horien erakunde autonomoek prezio publikoak kobra ditzaketela dekretu horren eranskinean zerrendatutako zerbitzuen truke; horrez gainera, 3. artikuluan ezartzen du Ogasunean eskumena duen sailak txosten loteslea egin ondoren finkatu edo aldatuko direla prezio publikoen zenbatekoak, dagokion saileko sailburuaren edo prezio publiko horiek jaso behar dituen erakunde autonomoari atxikita dagoen saileko buruaren agindu bidez.

Hain zuzen ere, uztailaren 30eko 397/2013 Dekretuaren eranskineko 5. atalean aipatuta daude, Hezkuntza, Hizkuntza Politika eta Kultura Sailak (gaur egun, Hezkuntza Sailak) prezio publikoz kobra ditzakeen zerbitzu eta jardueren artean, Universidad del País Vasco / Euskal Herriko Unibertsitateko goi-mailako hezkuntzako zerbitzu publikoak, titulu ofizialak lortzera daramatenak.

Goi-mailako hezkuntzako zerbitzu publikoen truke ordaindu beharreko prezio publikoak finkatzeaz gainera, eta inor ere arrazoi ekonomikoengatik unibertsitate-ikasketetatik baztertuta gera ez dadin, Unibertsitate Sistemari buruzko martxoaren 22ko 2/2023 Lege Organikoaren 32.6 artikuluan araututakoaren arabera, Gobernuak eta autonomia-erkidegoek, bai eta unibertsitateek ere, ikasleentzako beka-, laguntza- eta kreditu-politika egituratuko dute, eta unibertsitate publikoen kasuan, halaber, hainbat modalitate ezarriko dituzte zerbitzu akademikoen truke prezio publikoak ordaintzetik erabat edo hein batean salbuesteko. Kasu guztietan, arreta berezia eskainiko zaie mendekotasun eta desgaitasunen bat dutenei, ziurtatu egin behar baitzaie unibertsitate-ikasketak egiteko aukera izan eta bertan ikastea.

Arau hori betetze aldera, Euskal Unibertsitate Sistemari buruzko otsailaren 25eko 3/2004 Legeak 39. artikuluan biltzen ditu unibertsitateko hezkuntza-zerbitzuen truke ordaindu beharreko prezioen salbuespenak eta murrizketak, baita legez ezarritako gainerako eskubideak ere, araudi-aurreikuspenen esparruan Universidad del País Vasco / Euskal Herriko Unibertsitateko ikasleek baliatuko dituztenak. Era berean, artikulua horretan arautzen da prezio publikoak onartzeko aginduak edo akordioak salbuespen-baldintzak zehaztu ahal izango dituela, baita bestelako salbuespen oso edo partzial batzuk finkatu ere, betiere, inolako bereizkeria arbitrarioz ez dakartenean.

Beste alde batetik, araua egiteko prozedura izapidetu bitartean, Unibertsitate Irakaskuntza Publikoa Koordinatzeko Kontseiluaren aldeko txostena eskatu da. Bestalde, Emakumeen eta Gizonen berdintasunerako eta Indarkeria Matxistatik Gabeko Bizitzetarako Legearen Testu Bategina onartzen duen martxoaren 16ko 1/2023 Legegintzako Dekretuan ezarritakoarekin bat etorriz, Agindu hau egiterakoan genero-eraginaren ebaluazioa egin da, eta 20. artikuluan aurreikusitako prozedura eta izapideak bete dira.

Hori guztia dela eta, hau

#### XEDATZEN DUT:

1. artikulua.– Titulu ofizialak eta berezko tituluak.

1.– 2024-2025eko ikasturtean Universidad del País Vasco / Euskal Herriko Unibertsitateko goi-mailako hezkuntzako zerbitzu publikoen truke ordaindu beharreko prezioak (titulu ofizialak lortzeko) agindu honen eranskinetan jasota dauden tarifetan adierazitakoak dira.

2.– Gizarte Kontseiluak finkatuko ditu Universidad del País Vasco / Euskal Herriko Unibertsitateko berezko tituluak lortzera daramaten unibertsitate-ikasketen prezioak.

2. artikulua.– Goi-mailako Hezkuntzako Europako Esparrura egokitutako irakaskuntzak.

1.– Unibertsitateko gradu- eta master-irakaskuntzak.

a) Ikasgaien prezioen zenbatekoa lortuko da kreditu bakoitzaren prezioa gaiaren kreditu-kopuruarekin biderkatuz. Kreditu bakoitzaren prezioa kalkulatzeko, kontuan izango da, batetik, esperimentaltasun-maila, eta, bestetik, dagokion ikasgaien lehen, bigarren edo hirugarren aldiz matrikulatzen den (I. eta II. eranskinak).

b) Prezio bereizia duten unibertsitate-masterren eta gaikuntza-masterren zein loturiko-masterren kasuan, III. eta IV. eranskinetan zerrendatutako tarifak aplikatuko dira, hurrenez hurren.

c) Unibertsitate-master batean matrikulatutako ikasleak prestakuntza osagarri moduan krediturik egiten badu, kreditu horiei aplikatuko zaizkien prezio publikoak unibertsitate-master horri dagozkionak izango dira.

d) Ikasleak matrikulatu ahal izango dira komenigarritzat jotzen dituzten ECTS kredituetan, baldin eta Universidad del País Vasco / Euskal Herriko Unibertsitatearen iraunkortasun-arauek matrikula-modalitate bakoitzerako (dedikazio osoa edo partziala) eta ikasturte bakoitzerako ezartzen dituzten gehieneko eta gutxieneko mugen barruan baldin badaude.

2.– Doktorego-irakaskuntzak.

a) Urtarrilaren 28ko 99/2011 Errege Dekretuak ezartzen duenez, egiaztatutako eta baimendutako doktorego-programa batean onartutako ikasleek urteko matrikula formalizatuko dute V. eranskinean ezarritako prestakuntza eta jarraipenerako tarifen arabera eta VI. eranskinean ezarritako urteko tutoretza-matrikularen zenbatekoaren arabera.

Tutoretza partekatua arautzen duen hitzarmen bati lotuta dauden ikasleei hitzarmenean bertan ezarritakoa aplikatuko zaie.

b) Doktorego-programa batean matrikulatutako ikasleak prestakuntza osagarri moduan krediturik egiten badu, kreditu horiei aplikatuko zaizkien tarifak izango dira prestakuntza osagarri horri dagokion unibertsitate-masterrarenak.

### 3. artikulua.– Beste zerbitzu batzuk.

Ebaluazio, proba, azterketa, titulu, egiaztagiri eta idazkaritza-eskubideen truke ordaindu beharreko prezio publikoak VI. eranskinean zehaztutakoak dira.

### 4. artikulua.– Irakaskuntzarik gabeko irakasgaiak.

1.– Desagerrarazi beharreko planen barruan irakaskuntzarik ematen ez den irakasgaietan edo ikasturte horretan ematen ez diren irakasgaien kasuan ere, irakasgaiaren kreditu bakoitzari dagokion prezioaren % 25 ordaindu beharko da.

2.– Unibertsitateak, bere baliabideekin, beste ikasketa-sistemaren bat eskaintzen badio ikasleari, kreditu edo irakasgai bakoitzari dagokion zenbateko osoa ordaindu beharko da.

### 5. artikulua.– Matrikula-eskubideak.

1.– Matrikularen prezioa ordaintzeak bi azterketa-deialditarako eskubidea emango du matrikulan zehaztutako ikasgai bakoitzeko, betiere, ikasturte beraren barruan. Hori hala izango da, baldin eta irakasgaiaren ezaugarri bereziengatik eta ikastetxeak ezarritako planifikazioarengatik besterik erabakitzen ez bada.

2.– Ikasketa-planetatik eratorritako bateraezintasun akademikoek mugatuko dituzte matrikulan jasotako ikasgaietarako edo, hala badagokio, kredituetarako azterketa- eta ebaluazio-eskubideak.

3.– Xedapen honetan jasotako matrikula-eskubidea gauzatzeak ez du aldaraziko ikastetxe bakoitzean bertako ikasketa-planetako ikasketa-beharrizanen arabera zehaztutako ordutegi orokorren araubidea.

### 6. artikulua.– Ohorezko matrikula.

1.– Kredituka egituratutako irakaskuntzetan, ohorezko matrikulagatik egiten diren murrizketak ikasketa berberen hurrengo matrikulan aplikatuko dira (graduak zein masterreko ikasketetan). Gainera, master ofizialen kasuan, graduak azken urtean ohorezko matrikularen kalifikazioa lortzen duten irakasgaien kredituek masterreko matrikularengatik gutxiago ordaintzea ekarriko dute, graduak prezioan, baldin eta master hori gradua bukatu eta hurrengo ikasturtean egiten bada.

2.– Plan zaharra plan berrira egokitzen bada, ohorezko matrikulaz gainditutako ikasgaiari esleitutako kreditu-kopuruaren arabera murrizketa aplikatuko da.

3.– Murrizketa horiek Universidad del País Vasco / Euskal Herriko Unibertsitateko ikasleen kolektiboari besterik ez zaizkio aplikatuko, ez beste unibertsitate publiko eta pribatu batzuetatik datozenei.

4.– Batxilergoko edo Lanbide Heziketako goi-mailako ikasketetan lortutako ohorezko matrikulek ez dute murrizketa-eskubiderik emango. Soilik kalifikazio globala ohorezko matrikula bada izango dute matrikula ordaintzetik salbuesteko eskubidea, unibertsitatea hasten duten lehen aldian.

### 7. artikulua.– Ordaintzeko modua.

1.– Ezarritako prezioak epe bakarrean ordain daitezke, matrikula egiten den unean, edo bi epeetan, bietan kopuru berdina ordainduta; lehenengoa matrikula egitean ordainduko da, eta bigarrena abenduan.

2.– Lau hilabeteka egituratutako irakaskuntzetan, unibertsitateak badu baimena ematerik bigarren lauhilekoari dagokion matrikula lauhileko horren hasieran egiteko. Kasu horretan ez dira aplikatuko aurreko atalean aipatutako ordainketa-epeak.

3.– Era berean, ez dira aplikatuko 1. apartatuan aurreikusitako ordainketa-epeak, baldin eta ordaindu beharreko prezioen zenbatekoa 350 eurotik beherakoa bada.

4.– Matrikula formalizatzean, beka orokor bat eskatzeagatik prezioak ordaindu ez dituzten ikasleek dagokion prezioa epe bakarrean ordaindu beharko dute baldin eta beka hori ukatu bazaie, hartara eragotzi gabe ukatze horren aurka gora jotzeko errekurtoa jartzea.

5.– Matrikularen prezioa osorik edo partez ez ordaintzeak espedientea geldiaraztea ekarriko du. Matrikula ordaindu ez duelako espediente akademikoa geldiarazita duen ikasleak unibertsitatearen aldeko zorra sortuko du, ordaindu gabeko kopuruaren hainbestean, eta hori ebazpen bidez ezarriko da, eta interesdunari jakinaraziko zaio. Unibertsitatearekin zorrak dituenak ezingo du haren zerbitzuez baliatu eta, bereziki, ez zaio beste ikasketarik egiten utziko, ez zaio titulu-agiri-rik egingo, ez ziurtagiririk, ez bere ikasketa-espedienteari buruzko informazio-oharrik, ez eta beste matrikularik egiteko aukera emango ere.

6.– Aurreko ataletan ezarritakoa alde batera utzi gabe, Unibertsitate Masterreko irakaskuntzetan sartu berri diren ikasleek plaza erreserbatzeko unean matrikularen aurrerapen gisa finkatutako zenbatekoa ordainduko dute, hala badagokio. Kopuru hori matrikularen guztizko zenbatekotik kenduko da ondoren (3. esperimentaltasun-indizea duten unibertsitate-masterren prezio publikoaren % 15ekoa izango da). Matrikularik egiten ez bada, eta Universidad del País Vasco / Euskal Herriko Unibertsitateko Unibertsitate Masterrak Kudeatzeko Araudian ezarritakoarekin bat etorritik, plaza erreserbatzeagatik ordaindutako zenbatekoa itzuli egingo da matrikula ez formalizatzeko arrazoia bada azkenean ez direla betetzen sartzeko eta/edo onartzeko baldintzak, edo araudi horretan tasak eta prezio publikoak itzultzeko aurreikusitako salbuespenezko baldintzaren bat gertatzen dela.

8. artikulua.– Atxikitako ikastetxeak.

Dagozkion atxikitze-hitzarmenetan adostutakoa ezertan eragotzi gabe, atxikitako unibertsitate-ikastetxe edo -instituetan ikasten dutenek unibertsitateari ordainduko diote I., II., III. eta IV. eranskinetako tarifetan –ikasketen arabera– ezarritako prezioen % 25. Gainerako prezioak aurreikusitako zenbatekoan eta osoki ordainduko dira.

9. artikulua.– Ikasketak homologatzea.

1.– Espainiako titulu eta graduatarako homologazioa eskatu, eta, horretarako, gaitasun-proba edo proba orokor bat egin behar dutenek VI. eranskinean jasotako tarifa ordainduko dute. Prestakuntza-baldintza osagarri gisa zaintzapeko ikastaroren batera joan behar badute, dagozkion prezioak ordaindu beharko dituzte, ikastaro horien esperimentaltasun-mailaren arabera.

2.– Atzerriko goi-mailako hezkuntza-tituluen eta doktore maila akademikoaren arteko baliokidetasun deklarazioa eskatzen dutenek VI. eranskinean jasotako tarifa ordaindu beharko dute.

10. artikulua.– Baliozkotzea, aitortzea eta moldatzea.

1.– Titulartasun pribatuko zentroetan edo atzerriko zentroetan egindako ikasketengatik ikasgaiak baliozkotzea edo aitortzea lortzen dutenek unibertsitateari ordaindu beharko diote dagozkien eranskinetan jasotako tarifetan ezarritako prezioen % 25.

2.– Unibertsitate publikoetan egindako ikasketa ofizialak baliozkotzeak edo aitortzeak ez du kosturik sorraraziko, non eta ez diren atzerriko unibertsitate publikoak.

3.– Desagertzen ari den plan bat ezartzen ari den plan berrira moldatzeak ez die inolako gasturik ekarriko ikasleei.

4.– Unibertsitateko gradu- edo master-ikasketetan kredituak aitortzea lortzen duten ikasleek I., II., III. eta IV. eranskinetan ezarritako prezioen % 25 ordaindu beharko dute.

11. artikulua.– Familia ugariak.

1.– Familia ugariko ikasleek agindu honetan araututako salbuespen eta murrizketetarako eskubidea izango dute, baldin eta familia ugarizat aitortuta badaude, Familia Ugariak Babesteko azaroaren 18ko 40/2003 Legean jasota dagoen bezala.

2.– Tratamendua:

a) Unibertsitateko hezkuntza-zerbitzuen truke ordaindu beharreko prezio publikoen salbuespena, kategoria bereziko familia ugarietakoak badira. Salbuespena I., II., III., IV., V. eta VI. eranskinetan ezarritako prezioen gainean aplikatuko da.

b) Unibertsitateko hezkuntza-zerbitzuen truke ordaindu beharreko prezio publikoen ehuneko 50eko murrizketa, kategoria orokorreko familia ugarietakoak badira. Murrizketa I., II., III., IV., V. eta VI. eranskinetan ezarritako prezioen gainean aplikatuko da.

3.– Aurkeztu beharreko agiriak: dagokion foru-aldundiak edo arlo honetan eskumena duen administrazioak emandako titulu ofiziala, indarrean dagoena, eta familia ugarikoa dela aitortzen duena (kategoria ere adierazi behar da bertan); horrez gain, administrazio-egoitzaren ziurtagiria edo errolda-ziurtagiria.

12. artikulua.– Terrorismoaren biktimak eta haien senideak.

1.– Terrorismoaren biktimek eta haien senideek agindu honetan araututako salbuespen eta murrizketetarako eskubidea izango dute, baldin eta Terrorismoaren biktimei laguntza integrala emateko sistema garatzen duen azaroaren 9ko 290/2010 Dekretuaren arabera halako biktimatzat aitortuta badaude.

2.– Salbuespenetarako, biktimaren senidetzat joko dira senar edo emaztea, edo antzeko afektibitate-harreman baten bidez iraunkorki bizikidetzat izan duena, eta biktimaren seme-alabak, edo legez familia-harrerako egoeran daudenak.

3.– Soilik terrorismoaren biktima izateari lotutako inguruabarren zioz Euskal Autonomia Erkidegotik kanpo bizitzera joan behar izan duten pertsonak ere jaso ahal izango dituzte agindu honetan araututako murrizketa eta salbuespenak.

4.– Tratamendua: salbuespena, aipatutako azaroaren 9ko 290/2010 Dekretuaren 26. artikuluan arautua. Salbuespena I., II., III., IV., V. eta VI. eranskinetan ezarritako prezioen gainean aplikatuko da.

5.– Aurkeztu beharreko agiriak: Terrorismoaren Biktimentzako Laguntza Programara atxikita daudela adierazten duen ebazpena, indarrean dagoena. Horrez gain, biktima bera bada eskatzailea, administrazio-egoitzaren ziurtagiria edo erroldatze indibiduala; eskatzailea senidea bada, administrazio-egoitzaren ziurtagiria edo erroldatze kolektiboa.

13. artikulua.– Desgaitasuna duen senideren bat daukan familia.

1.– Desgaitasuna duen senideren bat daukan familia batek agindu honetan araututako salbuespenak eta murrizketak aplikatzeko eskubidea izan dezan, honako bi egoera hauetakoren batean egon beharko du: edo unibertsitate-ikasleak berak % 33ko edo gehiagoko desgaitasun-maila izatea, edo horren zuzeneko senideren batek % 65eko edo gehiagoko desgaitasun-maila izatea. Honako hauek hartzen dira zuzeneko senidetzat: ezkontidea edo berarekin iraunkorki bizi den pertsona (antzeko afektibitate-loturarekin), aita, ama, seme-alabak, neba-arrebak eta –otsailaren

18ko 3/2005 Legearen esparruan– harrerakoak direnak, baldin eta helbide berean erroldatuta badaude (3/2005 Legea, Haurrak eta Nerabeak Zaintzekoa eta Babestekoa).

2.– Tratamendua: unibertsitateko hezkuntza-zerbitzuen truke ordaindu beharreko prezio publikoen salbuespena goiko paragrafoan zerrendatutako egoeretan. Salbuespena I., II., III., IV., V eta VI. eranskinetan ezarritako prezioen gainean aplikatuko da.

3.– Aurkeztu beharreko agiriak: dagokion foru-aldundiaren edo arlo honetan eskumena duen administrazioaren ebazpena, indarrean dagoena eta minusbaliotasun-maila zehazten duena. Horrez gain, desgaitasuna duen pertsona bera bada eskatzailea, administrazio-egoitzaren ziurtagiria edo erroldatze indibiduala; eskatzailea senitartekoa bada, administrazio-egoitzaren ziurtagiria edo erroldatze kolektiboa.

14. artikulua.– Genero-indarkeriaren biktima.

1.– Genero-indarkeriaren biktimek (hots: Indarkeriaren biktimei laguntzeko Euskal Autonomia Erkidegoko Administrazio Orokorrean dauden koordinazio-mekanismoei buruzko martxoaren 1eko 29/2011 Dekretuak hala hartutakoek) eta egoitza berean bizi diren haren kargurako 25 urte-tik beherako seme-alabek agindu honetan araututako salbuespenak eta murrizketak aplikatzeko eskubidea izango dute.

2.– Tratamendua: unibertsitateko hezkuntza-zerbitzuen truke ordaindu beharreko prezio publikoen salbuespena goiko paragrafoan zerrendatutako egoeretan. Salbuespena I., II., III., IV., V eta VI. eranskinetan ezarritako prezioen gainean aplikatuko da.

3.– Aurkeztu beharreko agiriak: biktima bera bada eskatzailea, administrazio-egoitzaren ziurtagiria edo erroldatze indibiduala; eskatzailea senidea bada, administrazio-egoitzaren ziurtagiria edo erroldatze kolektiboa. Kasu batean zein bestean, genero-indarkeriaren egoera egiaztatzen duen ziurtagiri bat aurkeztu beharko da. Oro har, 5 urteko indarraldia hartuko da kontuan, egiaztapenean beste indarraldi bat zehazten ez bada. Norbait genero-indarkeriaren biktima dela egiaztatzeko, bitarteko hauek erabil daitezke:

– Emakumea genero-indarkeriaren biktima dela edo izan dela deklaritzen duen ebazpen judiziala.

– Biktimaren aldeko babes-agindua eta indarraldia.

– Fiskaltzaren txostena, babesteko agindua eman bitartean interesduna genero-indarkeriaren biktima den zantzuak daudela adierazten duena.

– 2021eko azaroaren 11ko Berdintasuneko Konferentzia Sektorialaren Akordioak, genero indarkeriako egoerak egiaztatzeari buruzkoak, bere II. eranskinean zerrendatutako gizarte-zerbitzuen, zerbitzu espezializatuen edo harrera-zerbitzuen txostena.

15. artikulua.– Nazioarteko babesaren eskatzaileak zein onuradunak eta aberrigabeak.

1.– Nazioarteko babesaren eskatzaileek zein onuradunek eta aberrigabeek agindu honetan araututako prezio publikoak ordaintzetik salbuestea lor dezakete, baldin eta maila bereko unibertsitate-titulurik ez badute.

2.– Tratamendua: unibertsitateko hezkuntza-zerbitzuen truke ordaindu beharreko prezio publikoen salbuespena. Salbuespena I., II., III., IV., V eta VI. eranskinetan ezarritako prezioen gainean aplikatuko da.

3.– Aurkeztu beharreko dokumentuak: administrazio-egoitzaren ziurtagiria edo errolda-ziurtagiria, eta hauetako agiri bat:

- Nazioarteko babes eskatu izanaren frogagiria eta, hala badagokio, luzapenaren justifikazio-agiria.
- Asilo-eskatzailearen agiria, egiaztatzen duena eskaera izapidetzeko onartu dela (txartel gorria).
- Aberrigabearen estatutuaren eskaera edo onarpen-agiria.
- Ukrainatik alde egin duten pertsonentzako aldi baterako babes lortzeko eskabidea aurkeztu izanaren frogagiria, babes ematen duen ebazpena edo egoiliar txartela.
- Nazioarteko babesaren onuradunaren ziurtagiria: errefuxiatua edo babes subsidiarioaren onuraduna izatearen justifikazioa edo arrazoi humanitarioen ziozko bizileku-baimena.

16. artikulua.– Agindu honetan araututako salbuespenak eta murrizketak emateko baldintzak.

1.– Agindu honetan araututako unibertsitate-zerbitzu akademikoen truke ordaindu beharreko prezio publikoen salbuespen eta murrizketen onuradun izateko, interesdunek egoera jakin horretan egon beharko dute ikasturtearen hasieran, eta kasu bakoitzean beharrezkoak diren agiriak aurkeztu beharko dituzte. Data horretan egoeraren aitortzea izapidetzen ari bada, aitortpen- edo berrikuspen-eskaeraren kopia konpultsatua emanez egiaztatuko da.

2.– Horretaz gainera, agindu honetan ezarritako kasuetan, interesdunek 2024ko urtarrilaren 1ean zeukaten administrazio-egoitzaren ziurtagiria edo errolda-ziurtagiria aurkeztu beharko dute. Hala badagokio, errolda-ziurtagiriak, etxebizitza berean bizi diren pertsona guztien zerrenda jasoko du.

Nazioarteko eta aldi baterako babesaren eskatzaileek edo onuradunek, bai eta aberrigabeek ere, badaukate auzotartasun- edo erroldatze-ziurtagiria geroago aurkezterik, betiere, ziurtagiri hori matrikulazio-data baino lehenagokoa izatekotan.

3.– Betiere, 2024ko abenduaren 31 baino lehen aurkeztu beharko dituzte agiriak.

4.– Ezarritako epean agiri horiek eman ezean, automatikoki baliogabetuko dira emandako onurak, eta salbuespena edo murrizketa aplikatu zaien unibertsitate-zerbitzuen prezio publikoak ordaindu beharko dituzte.

## AZKEN XEDAPENA

Agindu hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.

Vitoria-Gasteiz, 2024ko ekainaren 14a.

Hezkuntzako sailburua,  
JOKIN BILDARRATZ SORRON.

## I. ERANSKINA

## GRADUKO UNIBERTSITATE-IRAKASKUNTZEN ESPERIMENTALTASUN-MAILAK

1. esperimentaltasun-maila: Biologia gradua (S), Biokimika eta Biologia Molekularra gradua (S), Bioteknologia gradua (S), Elikagaien Zientzia eta Teknologia gradua (S), Ingurumen Zientziak gradua (S), Erizaintza gradua, Farmazia gradua, Fisioterapia gradua, Geologia gradua (S), Medikuntza gradua, Giza Nutrizioa eta Dietetika gradua, Odontologia gradua, Kimika gradua (S), Logopedia Gradua.

2. esperimentaltasun-maila: Artea gradua, Jarduera Fisikoaren eta Kirolaren Zientziak gradua, Kultura Ondareen Kontserbazio eta Zaharberritzea gradua, Sorkuntza eta Diseinua gradua, Fisika gradua (S), Arkitektura Oinarriak gradua, Ingurumen Ingeniaritza gradua (S), Ingeniaritza Zibila gradua (S), Ingeniaritza Elektrikoa gradua (S), Ingeniaritza Elektronikoa gradua (S), Ingeniaritza Elektroniko Industrial eta Automatikoa gradua (S), Arkitektura Teknikoa gradua, Energia Berriztagarrien Ingeniaritza gradua (S), Prozesu eta Produktuen Berrikuntzaren Ingeniaritza gradua (S), Industria Antolakuntzaren Ingeniaritza gradua (S), Industria Teknologiarren Ingeniaritza gradua (S), Ingeniaritza Informatikoa gradua (S), Kudeaketaren eta Informazio Sistemen Ingeniaritza gradua (S), Itsasketa gradua (S), Ingeniaritza Mekanikoa gradua (S), Nautika eta Itsas Garraioa gradua (S), Ingeniaritza Kimikoa gradua (S), Ingeniaritza Kimiko Industrial gradua (S), Telekomunikazio Teknologiarren Ingeniaritza gradua (S), Psikologia gradua, Itzulpengintza eta Interpretazioa gradua, Automobilgintzaren Ingeniaritza gradua (S), Adimen Artifiziala gradua (S), Ingeniaritza Biomedikoko Gradua (S).

3. esperimentaltasun-maila: Enpresen Administrazioa eta Zuzendaritza gradua, Ikus-entzunezko Komunikazioa gradua, Ekonomia gradua, Haur Hezkuntza gradua, Lehen Hezkuntza gradua, Gizarte Hezkuntza gradua, Zerga Sistemako eta Administrazio Publikoa gradua, Geografiako eta Lurralde Antolakuntza gradua, Negozioen Kudeaketa gradua, Enpresen Kudeaketa eta Marketina gradua, Marketina gradua, Matematika gradua (S), Pedagogia gradua, Publizitateko eta Harreman Publikoak gradua, Gizarte Langintza gradua.

4. esperimentaltasun-maila: Gizarte Antropologia gradua, Politika Zientziako eta Kudeaketa Publikoa gradua, Kriminologia gradua, Zuzenbidea gradua, Ingeles Ikasketak gradua, Euskal Ikasketak gradua, Filosofia gradua, Artearen Historia gradua, Historia gradua, Filologia gradua, Kazetaritza gradua, Lan Harreman eta Giza Baliabideak gradua, Soziologia gradua.

Esperimentaltasun-maila	KREDITUAREN PREZIO PUBLIKOA			
	Lehenengo matrikula	Bigarren matrikula	Hirugarren matrikula	Laugarren matrikula
1	18,92 (€)	28,60 (€)	44,01 (€)	60,86 (€)
1 STEM (S)	18,85 (€)	28,60 (€)	44,01 (€)	60,86 (€)
2	18,29 (€)	27,63 (€)	42,53 (€)	58,87 (€)
2 STEM (S)	18,23 (€)	27,63 (€)	42,53 (€)	58,87 (€)
3	13,72 (€)	21,03 (€)	32,37 (€)	44,14 (€)
3 STEM (S)	13,67 (€)	21,03 (€)	32,37 (€)	44,14 (€)
4	13,42 (€)	20,48 (€)	31,51 (€)	43,19 (€)



## II. ERANSKINA

## UNIBERTSITATEKO MASTER-IRAKASKUNTZEN ESPERIMENTALTASUN-MAILA

1. esperimentaltasun-maila: Osasun Zientzien jakintza-alorrari dagozkion titulazioak lortzeko irakaskuntzak.
2. esperimentaltasun-maila: Zientzien jakintza-alorrari dagozkion titulazioak lortzeko irakaskuntzak.
3. esperimentaltasun-maila: Ingeniaritza eta Arkitekturaren jakintza-alorrari dagozkion titulazioak lortzeko irakaskuntzak.
4. esperimentaltasun-maila: Lege- eta Gizarte-zientzien jakintza-alorrari dagozkion titulazioak lortzeko irakaskuntzak.
5. esperimentaltasun-maila: Artearen eta Giza Zientzien jakintza-alorrari dagozkion titulazioak lortzeko irakaskuntzak.

Esperimentaltasun-maila	KREDITUAREN PREZIO PUBLIKOA			
	Lehenengo matrikula	Bigarren matrikula	Hirugarren matrikula	Laugarren matrikula
1	35,72 €	52,75 €	70,12 €	109,56 €
2	35,50 €	52,42 €	69,67 €	108,90 €
3	32,45 €	47,91 €	63,68 €	99,54 €
4	29,39 €	43,39 €	57,68 €	90,15 €
5	25,64 €	37,86 €	50,33 €	78,66 €

## III. ERANSKINA

## PREZIO BEREIZITA DUTEN UNIBERTSITATE-MASTER OFIZIALAK

MASTERRA	KREDITUAREN PREZIO PUBLIKOA			
	Lehenengo matrikula	Bigarren matrikula	Hirugarren matrikula	Laugarren matrikula
Arte Garaikide Teknologiko eta Performatiboa unibertsitate-masterra	28,89	41,79 €	55,55 €	88,62 €
Kontuen Ikuskaritza eta Goi Mailako Kontabilitatea unibertsitate-masterra	28,00	32,76 €	43,55 €	85,89 €
Zeramika: Artea eta Funtzioa unibertsitate-masterra	28,84	41,72 €	55,45 €	88,47 €
Aktuariotza eta Finantza Zientziak unibertsitate-masterra	25,00	29,49 €	39,20 €	76,68 €
Kontrola Sare Elektriko Adimentsu eta Sorkuntza Banatuan unibertsitate-masterra/ Control in Smartgrids and Distributed Generation	44,00	51,48 €	68,43 €	134,97 €
Enologia Berritzailea unibertsitate-masterra	32,00	52,42 €	69,67 €	108,90 €
Ingurugiroaren Agrobiologia unibertsitate-masterra	32,00	52,42 €	69,67 €	108,90 €
Ingeniaritza Biomedikoa unibertsitate-masterra	62,20	89,97 €	119,60 €	190,80 €
Eraikuntzaren Ingeniaritza unibertsitate-masterra	50,51	73,07 €	97,12 €	154,95 €
Sistema Txertatuen Ingeniaritza unibertsitate-masterra	53,83	77,87 €	103,51 €	165,12 €
Industria Antolakuntzaren Ingeniaritza unibertsitate-masterra	52,71	76,25 €	101,35 €	161,70 €
Multimedia Kazetaritza unibertsitate-masterra	96,77	139,99 €	186,07 €	296,85 €
Pintura unibertsitate-masterra	28,89	41,79 €	55,55 €	88,62 €
Laneko Segurtasun eta Osasuna unibertsitate-masterra	28,00	32,76 €	43,55 €	85,89 €

## IV. ERANSKINA

GAIKUNTZAKO UNIBERTSITATE-MASTERRAK EDO  
LOTURIKO UNIBERTSITATE-MASTERRAK

MASTERRA	KREDITUAREN PREZIO PUBLIKOA			
	Lehenengo matrikula	Bigarren matrikula	Hirugarren matrikula	Laugarren matrikula
Abokatutza eta Prokuradoretza unibertsitate-masterra	16,09 €	29,49 €	39,20 €	76,68 €
Arkitektura unibertsitate-masterra	16,09 €	28,75 €	38,22 €	76,68 €
Derrigorrezko Bigarren Hezkuntzako eta Batxilergoko, Lanbide Heziketako eta Hizkuntzen Irakaskuntzako Irakasleen Prestakuntzaren unibertsitate-masterra	16,09 €	23,40 €	31,10 €	61,35 €
Telekomunikazio Ingeniaritza unibertsitate-masterra	16,09 €	28,75 €	38,22 €	76,68 €
Industria Ingeniaritza unibertsitate-masterra	16,09 €	28,75 €	38,22 €	76,68 €
Itsasketa unibertsitate-masterra	16,09 €	28,75 €	38,22 €	76,68 €
Nautika eta Itsas Garraioa unibertsitate-masterra	16,09 €	28,75 €	38,22 €	76,68 €
Osasun Psikologia Orokorra unibertsitate-masterra	16,09 €	36,31 €	48,26 €	76,98 €

## V. ERANSKINA

## 99/2011 ERREGE DEKRETUAK ARAUTUTAKO DOKTOREGO-PROGRAMAK

Tasa akademikoa	Prezio publikoa	
	Dedikazio partziala	Dedikazio osoa
Doktoregaiaren prestakuntza eta jarraipena	122,70 €	204,50 €

## VI. ERANSKINA

## BESTE ZERBITZU BATZUEN TRUKE ORDAINDU BEHARREKO PREZIO PUBLIKOAK

1. tarifa. Ebaluazioak, probak eta tutoretza.	Prezioa
1.1.– Unibertsitatera sartzeko eta bertan onartua izateko ebaluazio-probak eta unibertsitate-irakaskuntzara sartzeko proba espezifikoak.	86,33 €
1.2.– Atzerriko goi-mailako tituluak Espainiako tituluekin eta graduekin homologatzeko gaitasun-proba edo proba orokorra.	153,95 €
1.3.– Atzerriko unibertsitate-ikasketak partzialki aitortzeko espedienteen azterketa	153,38 €
1.4.– Atzerriko goi-mailako hezkuntza-tituluen eta Doktore maila akademikoaren arteko baliokidetasun deklarazioa.	240,45 €
1.5.– Doktorego-programetako tutoretza-matrikula.	36,87 €
1.6.– Doktorego-tesirako azterketa.	159,80 €

2. tarifa. Tituluak eta idazkaritza.	Prezioa
2.1.– Titulu akademikoak ematea.	
2.1.1.– Doktoregoa.	241,06 €
2.1.2. Unibertsitate Master Ofiziala (Tituluaren Europar Gehigarria barne)	190,17 €
2.1.3. Gradua (Tituluaren Europar Gehigarria barne)	190,17 €
2.1.4. Lizentziaduna, arkitektoa, ingeniaria (Tituluaren Europar Gehigarria barne)	161,83 €
2.1.5. Diplomaduna, arkitekto teknikoa, ingeniari teknikoa (Tituluaren Europar Gehigarria barne)	80,97 €
2.1.6.– Goi-mailako Hezkuntzako Europako Esparrura egokitu gabeko 1. eta 2. zikloentzako Tituluaren Europar Gehigarria, aurrez titulu-akademikoa ordaindu badute.	74,18 €
2.1.7.– Ikasketa Aurreratuaren Ziurtagiria / Diploma.	88,05 €
2.1.8.– Unibertsitate-titulu ofizialen bikoiztuak, ikasketa aurreratuen ziurtagiri-diplomarena, atzerriko tituluen baliokidetasun-ziurtagiriak eta homologazio-kredentzialak, eta Tituluaren Europar Gehigarriaren bigarren jaulkitzea eta hurrengoak. Titulua galduz gero bikoiztua egiteko dagokion aldizkariko argitaratze gastuak ordainduko dira	71,58 €
2.2.– Idazkaritza	
2.2.1.– Ikasketa-espedientea irekitzea ikastetxeren batean ikasketak hasten direlako, edo irakaskuntza-zikloa aldatu delako (Gradua, Masterra, Doktoregoa), egiaztagiri akademikoak eta ikasketa-espedientea tokiz aldatzea.	27,96 €
2.2.2.– Kopia autentikoak, autentikatuak eta konpultsatuak ematea.	
Kopia bakoitzeko	5,51 €
Kompultsatu beharreko agiriaren orri gehigarri bakoitzeko.	0,55 €
2.2.3.– Matrikula-gastu finakoak, oinarritzko istripu-asegurua barne.	30,68 €